

簡松草堂詩集

簡松草堂詩集卷二

錢唐張雲璈仲雅

雙清堂晚步

一徑晚蕭蕭涼生到薄綃詩情空院雨秋信大江
潮驗聞看金井懷人聽玉簫微風散蘿帶吹綠下
牆腰

郊晚

徙倚何嫌晚郊原入望俱綠田飛雪客秋草著春
駒樹色乍疎曠煙光時有無牧兒歸尙早牛背任
相呼

秋日懷鮑三若洲

薄寒乍中人切切風如箭落葉似鳥飛紛然下庭
院感茲秋氣深陡覺時序變眷言金石交相隔異
鄉縣昨朝新書來恍與故人見但見故人心不見
故人面懷君寄遠愁及此鴻羽便意多語偏澀枯
腸索屢徧展君篋中詩似與冰雪嚙

外舅大宗伯嵇公

恩命總河恭寄二首

九折崑崙水由來獻瑞頻呈圖躍龍馬鼓浪舞魚
人節駐黃符舊

公前任南河
今任河東

威臨紫貝新容臺

恩比重回首感 楓宸

漢使窮源候乘槎正及秋詩歌凌海若談笑靖陽
侯色映桃花浪聲迴竹箭流只憐兒女輩河廣問
鄉愁

秋日病起散步湖上邂逅金桐巢汪秋御
梁夬菴

落拓偏宜小病身桂花風起颺輕塵煙嵐遠列濃
于近湖水秋添綠似春話處逢僧剛半日
時值昭慶懷公
客來除我恰三人只憐隄上垂楊柳不比當時舞

態新

頭風

閉門長日對鑪薰隱几蕭然思十分小幔障風秋

瑟瑟重簾過雨暮紛紛

杜詩頭風如過雨

心情嬾似蠶三

幼

蠶三眠爲三幼見放翁詩

氣味乖于酒半醺莫向陳琳頻問

檄要將方法試銅芸

本草防風一名銅芸

題若洲蓉湖欵乃集

昨歲煩君送我行而今詩卷不勝情年年一櫂龍

山下飽聽蓉湖欵乃聲

東船西舫夜燈紅穩坐輕煙細雨中若向清波門
外住也應人喚鮑清風

文石歌

并序

梁冲泉表兄示予文石歌并自序云白鷺洲在貴州思南郡郭東一里萬勝瀨瞰二水中分沙禽翔集宛然吳越風景洲中石子磊磊可數如玉在璞如珠在胎土人善識別者水落時拏舟采揀剖鑿磨礪文理畢露雲物動植百靈千態備極天巧會予暫攝郡符購得若干枚以爲几桮之玩用長沙周雪舫蜈蚣石歌韻作歌二章云因屬子和勉次原韻

我不愛石亦拜服恍到思南山水曲公詩欲讀未
敢讀奇句不許一字熟此水不懷珠此山不韞玉
疑是女媧補天之所餘一一棄置滿川腹不然安
得如此五色奪人目玉斧何時工剗斲丹青滿几
俱閣束紛然羅列盡奇育又或范文鯁魚不受戮
見水經注化作百靈千態水底伏盆池星燦如北陸太
守談笑去莊肅鬱林石比公之清平泉石比公所
畜佳名獨造隨其欲石亦點頭意皆屬蜈蚣之石
產山谷形象懸知等虺蝮何似此石如花紅映肉
險韻酬來筆屢縮詩成且喜莫余毒

秋雨

雨暗書堂暮色昏
吟情無賴閉衡門
卽看落木瀟瀟下
便是江南黃葉村

寒廬況味太無聊
簷溜泔泔似遠濤
牆角風來吹薜荔
錯疑山鬼聽離騷

茗溪往還得五斷句

扁舟聊作近程遊
景物蕭條動客愁
一樣曉風殘月岸
可憐楊柳不勝秋

船頭獵獵葦風尖
吹得枯腸分外嚴
黃葉聲中人問酒
烏程村價一時廉

朝來長是怯衣單
滿地霜華踏未殘
昨夜月明深處宿
雨三人共一船寒

溪水秋來碧映天
菱絲荇帶總纏綿
近船野鳥如相識
曾對寒流住五年

溪上雙扉喚不應
再遊吾亦記吾曾
重樓小閣依稀見
猶是紅牕舊日燈

謂舊寓

唐栖大善寺古檜歌

扁舟晚欲泊繫纜依寒塘
塘邊古寺圍紅牆
三門開處煙華蒼
大樹一一排青黃
中有一枝檜其狀最奇絕
敲斜之勢欲折而未折
疑有神工斫削鬼

斧截不知曾經幾番猛雨淋狂飈掣雪片埋雷火
熬老榦橫撐直拒不肯裂皮膚剝盡筋百結但見
通身上下磊磊砢砢萬箇節苔蘚不敢封蟲螳不
敢齧元猿不敢巢蒼鼠不敢穴何年養就百鍊鐵
應是法王力護持能使長將人世閱不然旣非曲
轅櫟社不材木安保匠石過之行不輟我來長嘯
還相對摩挲何異撫鮐背驚起空山鸛鶴眠天半
猶聞老人欬

息圃觀劇

春宵風景太豪奢簫管聲中語不譁殘月曉風無

限意休將鐵板換紅牙

輕寒習習月濛濛夜半徵歌興未終幾度細聲聽
不得暗風吹入畫簾中

豈是吳娘水調歌琵琶掩抑思偏多坐中亦有深
情客不敢臨風喚奈何

銀燭離離酒半醒當筵哀樂幾曾經葫蘆依樣從
人畫翻對俳優識典型

立夏日雨中懷鮑若洲却寄

不定陰晴幾日中綠愁紅怨太怱怱草留寒色承
疎雨花帶春心墮曉風坐樹鶯啼深院落添衣人

在好房櫳遙知賀老江南住梅子吟成句又工

戊子報罷後與友人夜話

與爾同寥落挑燈語未稀故人多拾芥我輩竟無
衣一戰難言捷三年總欲飛相期各努力莫遣寸
心違

哭弟達

弟爲先廣文晉川叔父長子沒年
二十一

鵲鴿原上草初秋極目西風雁影愁冷落門庭新
鬼大更無餘淚哭長頭

留餘山居

藤蘿夾道如綠城籃輿破綠沿城行輿人芒屨踏

落葉乍聽風雨飛空聲西湖秀色攬不盡山居更
以留餘名我來正值十月候小春天氣風日晴層
臺拾級凌木杪坐視足底雲霞平下方樓閣十萬
戶危牆似雪煙中明聽泉亭子在山麓玉溜細滴
槽牀輕寒泓照面冷毛髮潤透石骨蒼苔生喬松
上爭霄漢立勢到自覺虬枝成野花紅碧紛滿眼
點染俱帶霜華清羽衣道士出肅客拂簞還供山
蔬羹自嫌麤糲更自謝一飽聊免腸雷鳴不辭日
日來此境行與猿鶴相逢迎茶鑪酒榼便位置一
杯時向深巖傾僕夫抵死促歸去夕陽半抹前山

橫出門却望來處路萬峰高下青迴縈

歲杪口號

東風已覺動春前奈是蕭條歲暮天只道梅花長耐冷也隨人意入新年

己丑人日臨平道中

微雨濕春意羣山綠未深煙飛茅店午雲過市橋陰雙袂禁寒色孤舟載客心梅花何處發繫纜欲相尋

早春遣意二首和梁諫菴

春色今猶淺春風已破閒日晴如睡起花發笑詩

怪鵲語來牕外茶香入座閒何時攜畫舫相約看
湖山

硯北低頭坐無人自掩扇雨留前日冷草帶隔年
青火樹看初近錫簫不暫停莫將春意負添設護
花鈴

和梁諫菴春日讀書

梁君示我讀書歌我欲和歌喚奈何君旣不如五
陵年少多婉孌綠楊走馬如飛電輕風繡幕晝看
花細雨紅燈夜開宴更不如含香侍從紫殿高上
林獻賦時揮毫鑪煙冉冉宮漏永禁中春色生春

袍胡爲局促蝸廬住晴日遲遲照窻樹一編憑几
發高吟花落深庭不知數蕉萃應從章句生功名
恐被詩書悞向人猶是誇討論面目年年只如故
吁嗟乎對君心事徒喟然與君同病還相憐空言
無補君莫笑不見古來詩狂常上天

梁夬菴去秋北上已及半載令兄諫菴適
以憶弟詩見示愈增懷思因寄都下四首
挾策向燕都如君意氣無風聲盤驛馬月色下檣
烏九十涼秋盡三千客路紆行來遊俠地定與故
鄉殊

楊柳綠千行相思各一鄉愁生春雨細恨壓暮雲
長失意傾杯酒雄心拂劍霜懷人舊滋味此日又
新嘗

聞道長安住情懷百不開封書憐舊雨斗酒炙生
煤朔雪衣裘薄層陰鼓角哀江南渺何處望遠獨
登臺

長鋏起悲歌思君閉戶多離心看白日遠夢識黃
河風貌青春色年華逝水波誰憐好兄弟池草句
堪哦

送湯南正表兄之蕪湖

湯兄黯然色不平向人揖別離愁生飢寒一通出門去一去便作千里行驪唱聲中辭故土自言不憚離家苦東西南北隨所往只恨身輕傍門戶春山脈脈春雲長春隄杳杳春草香風吹萬樹楊柳黃二十四番花未芳滿天寒雨峭帆下綠波難緩行人忙我來送君強懷抱勸君勿念還家早白髮寧從歧路生紅顏莫在鄉園老鄉園老徒悠悠面目恐爲旁人羞男兒當行萬里外此去笑君還近遊

越三日南正復來取別再送之

有木堂公言集
送行重送行君行留不得手折一枝柳上有古離
色青青兩岸江南山孤舟千里何時還東風昨夜
春水急落日揚帆竟出關

水仙

水石兩蕭然成此好風度娟娟冰雪寒一桁簾櫳
護疑是梅花魂凌波欲飛去

埽晴孃歌

埽晴孃簷際舞手指纖纖衣楚楚欲埽千行萬行
雨終朝埽晴晴不能持帚向空如有語爲言苦雨
當春生飛來銀竹看縱橫瓦溝瀉溜聲不停日光

難到明牕掃春畦豆麥徒青青田夫仰天愁似城
胡不奮筆圖寫風伯形狂飈一卷雲霾清復不鑄
劍入水底重淵斬却蛟龍鯢何爲翦紙象人立徒
見弱態珊珊輕埽晴孃我未聞汝言亦復知汝意
或晴或雨總由天責之於汝更何事從今不復挂
長竿一任聽殘雨無次君不見以紙作俑本不倫
何況乞靈於婦人

鷓鴣米歌

并序

漁洋山人居易錄云弋陽汪少宰偉赴
一中官請設飯止半盂而香滑迥異常

米問所從出云是四川以歲例入貢者
其米生於鷓鴣尾尾止二粒取出放去
來年則更取之其事甚異因同諫菴作

歌

鷓鴣米在尾中生成不假耕與春歲隨成賦貢

天庾珍重直比包茅供 盛朝物阜年和豐黃雲

翠浪皆芄芃倉箱既足困廩充實穎實粟無私公

怪茲小鳥亦何物異種敢奪田疇功 天家元不

尙奇味豈欲以是驚愚蒙乃知致此足稱瑞堯廚

肉筵將毋同不聽鷓鴣聲但徵鷓鴣米黃陵廟裏

落花多試問年年米有幾

湖舫春陰

遙天一角遠山輕嫩日常慳放曉晴默坐人同鷺
不語遲開花比句難成雲移薄暝紅闌入風約餘
寒綠幕生試上長隄望楊柳淡煙流水未分明

二月二日偕梁諫菴汪省吾湖上閒行用
少陵江上獨步尋花七首韻

局促此身年尙少相逢未敢說猖狂東風似惜遊
情嬾吹徧山花滿石牀

裏湖草堂湖水濱巡簷共索梅花春枝南枝北香

都徧始信山莊最可人

裏湖草堂又名可莊汪氏別業時梅花甚繁

湖塘一帶是人家半種垂楊半種花不及鳬鷗春水暖魚牀沙岸作生涯

大隄楊柳欲生煙萬縷千絲漸可憐折得長條堪策馬不曾相贈到離筵

一徑茅菴小院東閉門長日聽松風齋廚飯罷午鐘寂已是前山夕照紅

是日飯埽螺巷

踏遍青青草滿蹊東風吹徹帽簷低勒花十日春寒甚更禁流鶯不許啼

偷閒半日三人共只恐浮生老大催安得湖邊同

卜築青山面面草堂開

謝諫菴惠蘭

對君如對蘭爲誦國香句坐此一丈室瀟灑見風
度對蘭如對君莫令凡草妒微風盪簾波芬氤落
何處

紙鷺

樓臺百尺春風高風鷺決起千層霄生來骨相不
自重何論性命輕鴻毛片楮新糊繞栩栩疑是花
閒胡蝶舞欲上未上影踟躕又似學飛雙燕羽須
臾漸逐行雲騰猛捷直比離鞬鷹兒童仰面看不

得青天一點如秋蠅日中長繩繫無迹欲向人間
誇逸翮轆轤牽掣疑不穩側勢時防空際擲綠楊
城郭煙濛濛大隄寒食夭桃紅健兒飛來玉花馬
瞥眼直欲彎長弓年年三月遊人眾最高寒處勞
相送始知此事有手法要以高低善操縱羨他一
舉絕紅塵歸鴉過雁來相親置身能在千仞上不
知綫索仍由人

小樂府二首和諫菴

貧士行

不營什一方恐被室鬼笑不受一飯恩恐乏千金

報

猛士行

大雪壓陰山鳴笳夜度關腥風雙劍濕新斫萬人
還

苦雨排悶

料峭餘寒徹曉侵卷簾風雨晝沈沈鶉鴝聲裏人
閒坐門外春泥一尺深

茅簷長日暗濃雲潤逼衣篝火欲熏屋漏痕多常
自笑行來渾似祖參軍

愁霖行

濃陰壓頭不肯開
掘衣惝恍凌高臺
坐見南北兩

峰之雲氣盡挾浙江千里波濤來
東風習習濕吹

面矮屋如船漏痕徧花朝已過
清明來一半春光

未曾見我聞甲子晴乙丑明
四十九日滿天星又

說久雨須逢庚皆俗如何當此雨
徧甚人之有言

實不信苔階花砌起新漲
頽牆一聲比雷迅有時

暫止通霽色雲隙熹微漏斜日
朝來仍復見滂沱

昨夜分明月離畢阿香意氣鬱
不舒掉臂奮怒來

推車屏翳倔強更有態
但聞砰湃勢與霹靂聲相

俱去冬無雪天氣燠今年入春雨
如瀑應是田夫

淚萬行泥滑聲中鳩婦哭

香市詞

簫鼓中流去不回繞船蜂蝶競相催
白頭老嫗龍鍾語親見觀音大士來

三門禮佛動經旬乞福還修後世身
一尺春風宮

樣髻相逢多半過江人

浙西呼浙東爲過江人婦女皆高髻

小姑嬌小顏如花大姑盈盈秋水斜
聯袂燒香三竺去浴蠶時節便還家

春半偕孫春江梁諫菴孫誦芬陳懷祖汪

亢宗湖上

山光水色兩濛濛半是輕煙半是風有路總當蒼
翠裏無時不在畫圖中柳迎烏桺搖新綠花拂青
袍膩落紅多少通睂長爪客莫教孤負錦囊空

西湖冶春絕句十首

上巳纔過雨乍晴長隄三月落花輕香衫細馬人
無限一日東風盡出城

綺羅香裏氣氤氲消得風光日幾分十里明霞吹
不斷桃花紅到岳王墳

裙腰一道草萋萋燕尾舟輕泊槩齊今歲西湖春
漲大船頭高過白沙隄

美人家住定香橋檀版金尊碧玉簫欲把春波變
春酒載人都上木蘭橈

十五妖姬骨肉勻踏歌聯臂共尋春茜裙環佩東
風裏吹入桃花不見人

游絲無力上晴空行過沙隄趁好風十萬柳條齊
舞浪六橋浮在浪花中

昨夜風飄小雨聲絲絲初壓路塵輕直須更上三
天竺乞與朝來十日晴

花枝阿那柳娉婷不斷湖山面面青幾處樓臺照
金碧黃鸝啼上御碑亭

休將芳草怨王孫處處笙歌酒滿尊日晚遊情拋
不得畫船生怕近城門

報答春光詎有涯天教桃李作繁華帽簷欲插君
須插容易開花又落花

岳墳鐵像歌

三石像宜速去四鐵像宜永鑄

湧幢小品楊連真

像以己像雜之刻于飛來峰嘉靖時杭州知府陳仕賢擊下三髡像梟之三曰棄于閭去之

惟恐衆目汚鑄之足令姦魂怖至今墳上遊人來

拊擊一日千百回既壞仍復鑄既鑄又復壞壞者

欲其立碎糜鑄者恐其長朽敗如此方使人心快

吁嗟鐵人甚矣憊十二金牌三字獄聚鐵之錯已

難復當日彈章交上時岳氏奇冤堪痛哭我欲四

人增以六何不并鑄何中丞鑄羅御史汝楫一齊

長跪加鞭扑我聞丹陽陳少陽墓前亦鑄汪與黃

鄭君題柱像立仆既死猶覺心慙惶丹陽陳少陽墓亦鑄鐵肖

汪伯彥黃潛善嘉靖間鄭普過之題柱聯云丹陛披肝千古綱常可託荒庭屈膝兩人富貴何爲二

像應筆而仆如何四像甘摧折長作鐵囚居穢媒

見湖壩雜記終年髁縛墓門前或恐忠靈見之反爲褻究竟是

鐵非是人鐵抱無辜不能雪當時惜不將此鑄作

尙方劍斫却姦頭飲姦血鐵人有口終不說此鐵

真堪號頑鐵

寄居蟲歌

海水盪百族螺蚌無寧居一朝難自保蟬蛻泥沙

隅有物小如錢厥名爲蠃奴

本草云蟹如錢而沿居蚌腹者蠃奴也

緣適相值愛此多覬覦斗然乘閒入有若虎負嵎

生氣出空腹長養成完軀亦知悟所假不自安故

吾行來常郭索聚足如爬梳胡不入明月化作白

玉蜍長依擣藥兔終古隨盈虛不爾附水母爲鰕

鼓長鬚寒潮上下閒跋浪同鯨魚何爲橫行態局

促如蝸廬雖則局促如蝸廬天下寒士猶不如

山塘口號同應叔雅作

七里山塘歌吹聲
畫船蘭槳鏡中行
勸君莫聽吳
娘曲恐有瀟瀟暮雨生

開尊須得酒如淮
斜倚篷牕惱客懷
茉莉珠蘭香滿路
晚風吹過井亭街

舟過蓉湖同應叔雅梁諫菴坐篷背玩月
小飲作歌

船頭萬派金光明
兩槳畫月月有聲
狂吟直上篷背坐
自疑跨鶴空中行
是時照徹東西嶺
瑟瑟水風吹舴艋
星斗初稀烏鵲涼
波濤欲落魚龍靜
詩

人豪氣醉不眠舉杯邀月月
在船惟我與月不解
飲仰視無雲萬里之長天
蟲聲漸起四山寂露下
衣裳潤欲滴忽聞水面
唱歌來吹裂仙人雙鐵笛

艤舟亭

倚郭孤亭野岸頭當年玉局最風流而今無限臨
波柳只送人舟不艤舟

毘陵舟次喜晤鮑若洲

風急峭帆開輕舟共溯洄故人與明月天外忽飛
來落拓難言命酸寒祇愛才却愁容易別把袂一
徘徊

盤槐圖爲若洲題

并序

毘陵舟中若洲畫盤槐圖并謂予言童
時赴郡試見學宮盤槐數株蒼鬱可愛
今春同楷生約之再至毘陵盤槐僅存
一樹而予年亦四十五矣俯仰今昔草
木榮枯與人事得失爲何如也屬予題
句因與應叔雅梁氏昆季各賦二絕
閒把丹青畫古槐先生此際悵重來一株莫道凋
落甚猶見當年舉茂才

橋門一徑曉煙寒蕉萃蘭成作賦難尙有南柯來

往蠲功名且向此中看

毘陵郡署留別夾菴

昨歲西風落日寒送君匹馬上長安重逢舊侶愁
先破又感臨歧酒未懽瓜蔓水添歸櫂急梅黃雨
細客衣單艤舟亭外鄉園近他日相思夢不難

歸舟偕諫菴遊惠山秦園

竹笠桐衫入夏涼名園勝侶共相羊嵐雲下瞰千
章木水藻平分半畝塘拂檻不驚鷗鷺夢淩波欲
集芰荷裳就中我是重來客依舊蟬聲滿夕陽

櫂歌

撐篙打槳自年年愁水愁風路幾千只說載人夫
婿去如何江上有歸船

舵樓小婦髻鴉盤南北帆檣日日看多謝天公風
色便教儂來往總逢歡

望太湖

落日氣冥冥長魚出浪腥波搖空外白煙接大荒
青萬壑來天目千帆逼洞庭臨流心更怯不敢坐
揚舲

消夏會詠螢

昏黃庭院鎖清幽瞥眼疎螢點點流花密乍從飛

處見樓高常覺墮時愁千山月黑平津道萬樹風涼大業秋兒女不知前代恨只憑羅扇暫句留

望遠曲爲蔣映華

翩翩公子錦爲袍三載燕臺氣自豪若把閨情比鄉思不知何處夢魂勞

年年春色上垂楊楊柳絲多欲斷腸怕說相思是紅豆寄郎先要寄茴香

若洲書來兼寄吳斧仙見題拙集及和韻諸什寄酬一章予與吳尙未謀面也

涼風乍起秋雨飛綠蘿徑窄芭蕉肥懷人端坐百

憂集吟嘯獨自開幽扉故人遠寄書一紙中有傑
句相因依濃墨大字光照眼頗覺咳唾皆珠璣緩
聲何厭百回讀清氣習習生我衣伯鸞溪上多舊
友年年一櫂常忘歸形骸脫畧肝膽露欲與狂者
爭幾希俞君

是齋

詼諧雜談笑胸次活潑流天機

鮑子

若洲

坦白出真性皎如明月懸清輝王家孝

廉

變公

老待詔姓名廿載流京畿三人詩篇盡卓

絕蹀躞不受人閒轡延陵公子亦奇士作詩與世
無依違詞華直出溫李上沈博欲與揚馬幾神交
雖久不相見如未得食難療飢賤子局促落人後

學步詎免旁觀譏分牋擊盃強解事細蟲出戶聲
音微生來骨相自潦倒姓氏敢怪知音稀嗜痂在
古有奇癖此事問之今人非嗚呼誰謂此事今人
非感君風義還噓唏

呂耜堂姨丈人招同曹荔帷梁曜北方嘉
穗包蘊抒兄軒伯湖上納涼遇雨用東坡
夜泛西湖五絕韻同荔帷作卽呈耜堂先
生

野舫閒身位置安招攜勝侶足盤桓天風吹墮危
巒影濃翠翻從水底看

挾雨雲拖日脚垂晴湖忽作雨湖奇納涼此際不
知暑正是竹深荷淨時
坐來篷底話縱橫畏暑心情望後庚一櫂菰蒲深
處過刺船猶作雨飛聲

蓮葉無窮接渺茫碧筒瀉酒帶花香直教比作金
莖露不數蘭陵琥珀光

涼風過處果如仙蘋葉菱絲綠滿川却愛龐翁老
居士坡頭曳杖聽鏗然

竹夫人

紗幮消受扇紈風輕汗霑來薄暈紅玉骨可憐無

比瘦對人心路太玲瓏

苦熱二十六韻

卓午雲峰斂天青赤日驕萬方臨大火千里扇炎
飈地作龜紋坼人憐舌本焦長空稀過鳥高樹促
鳴蜩沸鼎煎方急洪鑪氣自熖炎威愁永日快意
望深宵紫電翻殘照紅霞徹九霄星光淩水動河
影接天遙想像秋來早依然暑未消今年春苦濕
入夏雨猶饒餘潤林塘積繁聲屋瓦跳梨花寒漠
漠梅子晚蕭蕭著屐衝泥濘添衣怯暮朝一時成
坐甑六合忽爲窯

玉川句六
合烘爲窯

已覺身堪患還思境

遠巖亭前圍曲榭檻外接飛橋梧葉陰書帙荷香
遞酒瓢瓜瓢刀屢剖冰水手頻調辟暑犀堪握迎
涼草不凋坐尋磐石釣行趁木蘭橈漁父同閒汎
鳬翁訂久要竹風來渡口蘿月過沙腰酷吏終難
去初禪不可招釋皎然句初禪已無熱居無河朔避出畏陸
渾燒白傅空淘晚樂天句誰能淘晚熱閒飲兩三杯相如更病瘠
路人猶襍穢且莫厭煩歎

喜涼

乍覺涼生好能消熱客心晚來多細雨坐久愛輕
陰螢火銀塘亂蟲絲翠蔓深明朝理雙屐湖畔恣

幽尋

偶成二首

團扇動輕風果似月在手小立晚涼時紅霞淡楊柳

畏暑不成寐往往中夜起流螢來照人人在蟲聲裏

敬錄先大夫遺詩有感

無復當時笑語溫忍看遺草篋中存涼風吹木長含恨苦雨吟詩轉斷魂卅載家聲傳卷帙百年心血付兒孫此身失怙悲何早淚盡淋漓舊墨痕

歷歷心情迴不磨平生都向此中過他鄉柳雪

王程遠故國蒹鱸感興多

集中大半于役之作有使楚西江楚中使秦秦

中諸集

什襲自同堂構重殘編還仗鬼神呵寒牕日

暮增嗚咽長似傷心對蓼莪

檢先大夫手札感賦

當時未解憶長安書札空留此日看門戶支持憑

尺素墓田鄭重說雙棺

諸札半爲祖父母葬事

江潮淮岸魚

鱗遠楚雨秦雲雁足寒泉路七年音信斷一緘纔

識寄來難

過夾牆巷故居見西舍柏樹已出牆矣感

而有作柏爲先大父手植

里巷重來跡已陳
過牆翠柏漸輪囷
也應中落憐門祚
未免相逢比路人
手澤難留千載遠
墓田初種兩行新
去冬始卜葬
涼陰颯颯多風雨
疑有當時舊室神

題三叟圖

青石大桹鏡面揩
有叟列坐三人皆
藉以落葉兼蒼苔
一叟皤腹還于思
驪然微覺動頰頰
治耳出物如角鯢
妄語母乃成齊諧
一叟烏紗髮際髭
蒲葵大扇新涼催
欠欠坎坎意漸頹
玉山不許有人

推一叟僂坐背已飴朱顏散纈如嬰孩鳥爪搔癢
誰可差按摩有術舒筋骸綺葱赤薤本自佳交梨
火棗何用栽屠龍之肝斲豹胎仙家豈慮口腹乖
獨取碧藕冰盤堆黃瓷斗撥深缸醅但願有酒長
如淮酬爾勸爾忘喧愆酌我酤我生嘲詼橘中二
老事可咍爛柯一樵孰使陪香山竹林指所排此
圖豈必皆其儕仙乎人乎徒見猜我欲從之遊八
垓長風落落吹紅埃

夬菴歸有期矣又復不果悵然寄此

終朝苦炎蒸畏此三庚伏故人如清風可以解煩

溽側聞賦過歸心喜惟我獨願君行期近願君風
帆速爲君敝茅軒埽破秋苔綠況逢八月來新涼
可預卜一尊還共傾濁酒不須漉忽焉歸興闌莼
鱸意不屬念我同心侶清愁屢振觸後會豈云難
前諾已留宿舉頭望明月明月入我屋一水何盈
盈佳人在空谷

郊外晚眺

放眼遙天外蒼然暮色高千山圍落日萬木捲秋
濤草陌堪盤馬邊城想射雕西風涼似水思借赤
霜袍

自西堰橋泛舟至洗馬灘卽日

十里寒塘路沿緣一櫂閒
白雲封曉渡紅葉繡冬
山沙鳥驚人去溪漁導我還
只憐衰柳色零落不堪攀

賣女詞

八歲小女兒生長在茅屋
去年阿耶死有母不能
育賣女錢十千聊以繼
饘粥得却手中錢失却心
頭肉女淚盈一把母錢盈一掬
阿女淚未乾阿母
錢已足寧爲貧家兒莫作富家僕
戒兒勿癡頑只恐遭鞭扑

簡松草堂詩集卷三

錢唐張雲璈仲雅

託人分寄書函各附一詩於後以志懷私

外舅副憲嵇公

自挂春帆指帝畿長安吟望思依依河流東郡

黃符下霜冷南臺白簡飛

公以總河入爲大司空左遷今職

遠道

一秋稀雁字鄉愁三載滿朝衣後車豹尾邊城外

飽看郊原射獵歸

鄒介如師

廿載公車上國門一鞭常傍潞河渾宦遊敢說同

雞肋清味由來比菜根先生時令安肅地產美菜故云此日訟庭
花自靜當年講席語猶溫獨憐弟子青衫舊吟袖
爛斑流墨痕

常州太守梁冲泉表兄

銅符重綰出京華五馬前頭靜不譁政到催科甘
就拙路隣鄉國免思家蘋花香遠來書少梅雨聲
寒別恨賒予于五月過郡回首天南眞萬里夜郎城外聽
邊笳兄前守遵義

嵇蘭谷刺史

路入滇池隔遠天傳聞絕域動烽煙一官跡滯蠻

鄉外八口魂驚戰壘邊
石寶山高雲漠漠金沙江
冷水濺濺鞞刀我亦雄心起
便擬從軍事少年

蔣公子映華

天涯芳草信音稀
悵悵王孫竟不歸
繡陌人看夫婿馬
鳳城春換故鄉衣
五陵爭說纏頭費
百姓休憐燕子飛
此日黃金臺畔路
西風楊柳尙依依

俞是齋

三年作客寄燕臺
障眼黃塵撥不開
小婦愁含江上夢
故人書比嶺頭梅
坐消髀肉空多感
聽唱刀鐮尙未回
昔日汪倫送行地
可能還憶踏歌來

鮑若洲

曲水亭前汎小舸平生詩態憶吾曹攀枝欲墮桓

溫淚

嘗畫盤槐圖有樹猶如此之感

懷友空憐范叔袍

書來備述其友吳一

峰貧狀

無恙丹青紛在眼頻來書札敢辭勞虛牕落

葉驚殘睡吹徧西風切夢刀

施肩吾句三更風作切夢刀

梁夫菴

瑟縮秋寒瘦骨知如君同調最相思鄉心忽滿江

南水蠻語重編徼外詩

時補輯黔遊諸作名蠻語集

官閣聯吟

燈豔豔河橋送客雨絲絲無端又戀蘭陵酒籬下

長憇采菊期

大風偶作短歌

大風搖山山欲動黑雲蔽天天無縫老鴉墮地如
葉輕撒瓦寒聲雪珠重主人拳曲同鵲栖裏頭僵
坐睂睫低推牕但覺刀刮面冷氣入骨無羔麕吁
嗟乎廣廈萬間誰是主屋茅三重竟何補世上今
多少陵杜

喜午樓舅氏歸自京師

一聲樂府唱刀鏤南雁行中人北還長路誰憐衝
雨雪夢魂猶是落江關盡傳姓氏如鱗角喜對文
章識豹斑

時以途中倡
和卷見示

三徑卽今無恙在且教安

穩住湖山

無寐

徙倚不成寐重幃意欲迷梁空墮饒鼠月黑叫荒
雞寒柝千聲急昏燈半壁低遙知嘹唳處天外雁
行齊

領鄉薦二十四韻

九月涼秋節三年熱客腸青雲開路近丹桂夾城
香送喜紅牋重題名白屋揚未應訓賀客先欲慰
高堂靜裏傳聞悞風前吉語長自憐貧女嫁人識
早梅芳楊葉頻年射槐花兩度忙長生應有籍鄉

貢已稱郎衣上痕猶碧睂閒色驟黃恩非嫌地隔

事豈比天荒羶筆書皆羨容刀脫敢忘在前盧姓

氏

榜首盧潮生

得御李門牆

予出三原李澹園先生之門

座主崔家

沆門生陸氏莊泣隅愁滿坐攜手幸同行

予與湯南正費

堯峰兩姊婿同讀書梅東書屋是日又皆在吾家待榜子與費獲售而湯竟落解

在昔先

公貴羣誇弱冠強蓬山飛捷步海水汎輕航依沼

隨鵝鷺凌霄見鳳凰成材皆杞梓報國是琳琅一

第雖叨薦重泉祇自傷亦思追白樸猶恐媿青箱

梯路看初枕源流此濫觴撫心知尺寸努力但文

章福命知何在才華總易量頗聞相喚熟恰稱孝

廉張

公讌呈諸同年

簇簇齊銜貢客肩
鹿鳴歌後倣華筵
修來士禮初相見
詔上公車不限年
此日人傳千佛號
何時名動五雲天
崔家錄事分明在
莫學尋春紫陌邊

用唐崔彖不赴曲江宴爲崔沆判罰故事時崔君修紳在座故云

晚發東新關

拋却春光向北行
少年何敢怨長征
心知入世終嫌拙
身到離家始覺輕
遲暮庭闈憐病影
清寒門戶感浮生
京華此去三千里
回首鄉關第一程

嘉禾道中

小艇柳霏霏梅花事已非
絳痕隨岸轉帆影逐雲
飛別意憐長水春寒上短衣
由來煙雨地望遠漸
依稀

京口

大江東望海天青
空外魚吹霧氣腥
萬戶樓臺涵夜色
連檣燈火亂華星
晉陵地遠人初別
瓜步風寒酒易醒
回首鄉園正愁絕
沙洲鴻雁不堪聽

大霧渡江

極目知何處輕帆不敢開
長空迷浪去一氣混天

來轉柁雲中出浮槎海上回金山鐘磬遠隱隱落
僧臺

淮上

挂帆朝向楚州過淮水湯湯歎逝波入世幾人逢

漂母居民生小說甘羅

里諺云文有甘羅武有韓信

射陽湖近

驚沙集下相城連戰草多清口由來襟要地黃符
終歲苦防河

淮陰釣臺弔淮陰侯二首

淮陰年少膽猶麤抵掌英風拔劍呼入賀竟成烹
狗局僞遊誰信掇蜂圖力辭蒯徹生何罪陰結陳

稀死近誣只把侯封酬大將始終齊楚一王無
勝下王孫氣未揚生涯曾寄一竿長功如漢幟原
難立身是良弓要善藏亡去始知稱國士死來何
苦作眞王將壇此日無人問賸有荒臺照夕陽

黃河

水色澹天地長看萬古渾波翻沙底活聲挾戍樓
奔噴薄無淮甸搖溶入海門尋源吾有意西去溯
崑崙

下相城爲西楚霸王故里

鴻門一日宴項王天下已失半咸陽三月火項王

天下盡非我劉項死生只爭此漢王得生項王死
重瞳苗裔誠孺子算來惟有殺宋義此舉可以雄
一世七十老亞父只將劍擊沛公作奇計烏江之
渡有人待人謂項王何不再我謂此是英雄真氣
概安知亭長船不似田父給大風之歌爲帝皇垓
下之歌乃滅亡富貴幾人歸故鄉七十餘戰萬人
敵千年而後成憤王黃流城下浮孤艇指點行人
說扛鼎可憐萬事俱不成仍與學書學劍等

又次勞廉叔韻

蓋世英雄氣不磨美人駿馬竟如何一生失計三

提袂萬事灰心四面歌鉅鹿能亡秦社稷鴻溝難
割漢山河錦衣富貴徒虛願空對驚沙泣逝波

徐州陸行

一片雄心馬上飛長途結束舊征衣天浮龍氣風
沙古地敝河壩草木稀千里橫雲春色斷萬山寒
影夕陽微勞人自昔嗟行役回首鄉園計便非

途中雜詠

落日冷黃河荒原一騎過路歧人問鬼戍古月沈
戈老柳撐空腹迴沙聚礮渦春光瞻馬首祇是朔
風多

觸目殊方景東齊舊俗貧土密人似蟄荒店火成
燐屋角雞飛慣隄閒馬踏陳雙輪朝暮動辛苦惜
風塵

驅車行二首

驅車復驅車暮行水曲朝山隅驅車復驅車我僕
旣痛我馬瘡勞人自昔悲草草我來況是長安道
馬上征衫帶雪披盤中客飯連沙飽驅車兮黃塵
深雙輪碾碎行人心

驅車復驅車長安路遠三千餘驅車復驅車衣裳
顛倒鬚眉枯北風悲號日西景我心孔疚行孔亟

五陵少年寶馬馱此日車中苦偏仄車中偏仄不
自由道傍有人能跨牛

道中春分

歷落長隄路縈回故里心客愁無久暫鄉信任浮
沈折柳風吹鬢揚鞭雪滿襟天涯驚物候二月未
春深

早行

曉色動鴉翅春寒逼馬鬣天開平楚白月落大山
空古道逢人少深林識徑通自憐羈客況辛苦夢
魂中

過東平州皆山石崎嶇路甚險仄

百里山盡童戴石大于斗陰風起怒號驅石下山
走車行甚艱苦宛轉避石醜猙獰窺我左頤劣蹲
我右利角當其前積鐵斷其後路迴不及防轉接
勢更陡懸崖不卽落意欲壓馬首車輪碾石行聲
裂地維厚兩剛不相讓狀若亂擊掊石罅車欲傾
堅持理難久向來輿脫輭往往十八九僕夫懼不
穩下車壓以肘仰視天無情寒日下高阜驚沙橫
空來大半塞人口可憐坐難安偈仄束兩手早懼
魂魄飛敢憎面目垢人生厭奔馳到此亦默受客

淚不輕彈已覺迸林藪

杜詩客淚迸林藪

偕章右周王允鍾費堯峰趙景文諸同年

南歸

蕉萃征衫滿面沙栗留聲裏暫還家酒逢燕市偏
多感路指江鄉不厭賒作客一春飛燕子懷人五
月落梅花歸舟攜得同心侶牕牕何容起歎嗟

上牕

急流爭一門峭石夾兩堵奔湍下驚濤噴沫濺飛
雨我舟當其衝欲上勢殊逆舟子戒勿喧傳呼牕
夫聚鳴鉦集會豪分曹類部伍船頭繫長繩有若

毒蛇巨沿緣傍牖行牽挽力須努船進水愈急疑
是觸其怒百夫同挽繩亂比蠅集腐鼠口齊一聲
聲聲喚邪許并力行向前諦視纔半武偶焉勢少
縱退步仍故處不知脫手時倒擲更何所篙師利
用短左右便撐拄須臾上牖來仿佛就平楚舟人
相慰勞繫竿買村醕回望後行船正復在險阻只
恐至前牖又受此辛苦

下牖

上牖魚緣竿下牖僦建屋自過南旺來水順等巖
瀑我舟居上流俯視若深谷舟師鼓雙櫂欲下屢

畏縮大繩挽且留舒絞用機軸始知勢將縱其理
必先蓄有時掉尾行倒放入洄洑瞥見數仞高直
下似奔逐一擲向波底疑葬蛟龍腹頃刻十里閒
欲視不留目逆流苦太遲順流苦太速順逆皆畏
途何以慰碌碌

守牖

放牖如放逃閉牖如閉牢出牖如出釜守牖如守
壕三里一停櫓五里一停篙比人命屯遭無一快
意遭終朝對牖門石疊兩堵高橫流貫方木繞柱
纏曲絢壓之以巨槌急湍不敢撓板隙迸細流有

若珍珠槽南北列長檣多于蝟上毛好風船尾來
吹我素錦綢況復逢順流千里波滔滔若無此阻
滯豈不意氣豪可憐日守株徒使心爲忉牖吏一
時貴公然大權操啟閉在其手傲色凌吾曹開口
言 朝廷此牖爲糧艘不能少通融孰敢擅叫囂
一聲響鳴鉦尊官擁大艚手版趨河干下首而高
尻立時命啟牖逢迎不辭勞民船伺其便欲上殊
噉嘈官去牖卽閉所差止釐毫依然泊故處愁坐
兩鬢搔皇天忽霖雨三日飛秋濤諸水盡奔匯但
見濁浪淘有板不得下浮水如束蒿七十二牖閒

上下成通漕揚帆我竟去此惠天公叨筮旅得同人後笑先號咷

分水廟

祠廟陰陰柳色蒼擘流誰使踞中央南浮徐沛三分少北達臨清太半長往事尙聞談白老居民只解祀龍王多情惟有船頭水先送歸心到故鄉

輓同年趙孝廉景文

名夢蟾婁縣人道卒
蕪家廬年二十七

飄泊鄉書絕閒關病骨輕死猶成獨客心祇戀空名風急虞歌斷原荒鬼火明倚閭憐白首還自計

歸程

歸舟渡江

十里輕帆翦浪行客心差喜是歸程扁舟風色依

然好多謝江神不世情

施肩吾及第後過揚子江詩江神也世情爲我風色

好

再上公車有感

又著征衣去故鄉分明重畫冷朝陽天涯雨雪催人遠夢裏關河怯路長祇是琴書隨落拓未容裘馬擅清狂東風欲別頻回首攀折柔條已漸黃

夜過梁溪鮑若洲吳斧仙俞是齋嵇存之約之昆季餞于虹橋之絢秋軒卽席留別

卽用是齋送別韻

屈指征程直北遙
扁舟且復過虹橋
談深往事燈從暗
坐有離八酒不消
門外晚風吹鬢冷
筵前絲雨上衣潮
定知此去無多別
握手何須歎寂寥

江上

風急亂帆開江狹
狹狹來濤聲翻郡郭
日氣冷僧臺
客路南雲斷鄉心北雁催
金焦明雨點篷底首重回

櫂歌

一程纔過一程長
楚水吳山各斷腸
江女停橈唱

船尾東南風起客思鄉

瓜步夜泊

繫紩孤城外江天壯旅情五更殘酒醒千里怒潮
平月黑沈山氣風高裂雁聲惟餘燈影在留照夜
淒清

正月二十五日自王家營陸行大風寒甚
雨霰交作昏黑始抵魚溝

昨渡黃河來天氣頓殊絕侵晨上征車朔風何凜
冽重雲屯大野挾雨未肯洩雪飛不成花萬斛珠
可掇橫空忽盤旋半雜驚沙屑颯然箭簇飛亂射

人面裂當風不能語寒氣喉閒結馬行未數里凌
競力已竭十步九倒退有若從後掣暝色四山起
日影奄已滅荒徑無人煙有火未能熱車中人疊
坐面目苦難別但聞悲號聲萬木空際折倉皇赴
前村野店數椽列入門拂塵土茅屋差喜潔主人
具燈火爲我麤糲設偃息賴繩牀布被裹寒鐵世
間行路難半爲利名熱當境悔自生事過仍不決
所以來往人天涯屢更迭

道遇陳治泉州倅

旣作天涯客何妨在路旁身謀同見拙心事各言

傷馬踏長隄葉裘沾古戍霜邇來偏任達不復話
江鄉

馬上

馬上相逢客誰能不憶家功名分眼底筋骨付天
涯雲過寒韜日風來氣擁沙自將心事數一一起
長嗟

發銅城驛

道遠心長怯天空日易曛馬蹄翻亂石鵬翮掣寒
雲歧路人多淚荒原客喜羣不堪淒絕處鈴鐸靜
中聞

河間

兩度城邊過驅車斥堠長九河無故道六藝有賢
王老木風生虎平沙石臥羊當年暴公子繡斧鎮
巖疆

景州

滿目悲行役憑誰問苦辛寒聲催白雁鄉淚積黃
塵淀外冰猶壯營邊柳不春由來燕趙地慷慨說
佳人

土銼行

寒風北來雨點急荒村矮屋黃茅濕頭白老翁土

銚炊眯眼煙飛欲成泣行人下馬立道旁試問此地何荒涼翁言連年遭歲歉皇天不憫民之殃去秋淫潦滿鄉縣高陵平地波濤遍嗷嗷中澤聽哀鴻鄭俠圖中昔曾見朝廷恩重念民依議賑但願天下肥一家走領一升粟一升且免一日飢我聞茲語淚如綆老翁勸言勿悲哽有餐猶足飽餘生君不見前村無人土銚冷

曉發

旅客愁侵早郎當聽馱鈴敗牆銜落月渴馬飲寒星沙路光初白霜林氣自青回看茅屋下殘夢鑷

重局

宿南留智旅舍燈下言懷三首

皇天困羈旅顏色慘不平嗟我遠行邁明月已再
盈征途轉兩轂獨向長安行比來燕齊道猶隔千
里程道中何所有往來鈴鐸聲輿夫把長鞭面色
如墨黥寒冰雜沙礫凍草無抽萌老柳自生火空
腹煙氣撐車輪碾劣石迸散星光明仰視長空色
寥廓天宇清雲霾忽四起白日韜光晶黃塵漲天
來飄若苦霧生呼聲動曠野陡覺心魂驚朔風緊
人骨瘦極翻崢嶸天涯景色別一日一變更炙背

坐茅屋應羨蚩蚩氓

馬頭見孤村心比到家喜驅車行向前意謂得所
止入門看茅屋損壞無有比斷樹架作梁上猶絡
藤藟土色立四壁已見一半圯外與荒原通出入
憑野豕驅之不肯去灼灼向人視麤糲設一餐就
食無榻几主人前致辭客莫厭鄙俚去年天雨淫
鄉縣遭大水十家九漂泊存者亦遷徙而我幸無
恙且復戀故址明日君前行未必猶似此默然謝
主人繩牀聊倦倚藉草爲茵褥轉側在泥滓殘燈
耿青燐一剔光已死心怯聞鬼聲風窻嘯故紙臥

枕連馬槽蕭蕭聲滿耳飛沙灑人面一夜再三起
開門建星中呼僕整行李

客從何方去云是返田廬同爲行役人恨我非歸
途煩君過我家平安寄一書高堂有老母白髮難
爲娛復有病阿兄獨自當門閭寒閨更蕉萃辛苦
烏將雛出門亦未久頗覺多憂虞一身無微權宛
轉隨僕夫舉動出勉強未許安故吾所爲非真情
久久情亦無北風利如刀凜冽吹肌膚所嗟心事
改敢惜容華枯遊俠少年子意氣充 皇都揚鞭
大道旁冠蓋相爲驅豈不在行路自與常人殊對

之亦生羨不能學時趨慷慨發長歎媿此蕞爾軀
揮手與客別立馬還踟躕

漫河道中

作客心情強自寬亂雲殘照夕漫漫行經長路何
辭遠細數歸鴻只獨看綠酒紅燈思往事重裘單
馬畏春寒鄉園景物應如昨不道征程爾許難

雨宿涿州

蕭瑟天涯雨淒涼旅館身夜寒牕外重歸路夢中
眞虛壁挑燈暗遙村擊柝頻今朝衣袂上又染
帝鄉塵

大風夜過先鋒坡

戍黑斷嚴更人呼大野聲怪鴟蹲樹嘯疲馬逆風
行列炬同時滅重裘一例輕難難防失道只是問
前程

蘆溝

帝城雲闕望嵯峨薊北塵沙二月過馬上鄉心歸
不得隨風吹落小黃河

思鄉橋

在豐潤宋徽宗北狩立馬橋上四顧曰我安得似此水還鄉邪

世閒恨事不可說天子亦作無家別思鄉淚滴流
水中至今橋下聲嗚咽憶昔敵騎來皇州萬乘一

出成俘囚達官走避六宮散屬車望斷天邊愁龍
沙消息歸何許太乙宮中誰是主當年果似水還
鄉那得錢唐一片土停鞭立馬風蕭蕭馬前蕃士
慘不驕翠華去後竟難返此橋不如萬里橋

四月十二日下第出都

碌碌風塵改舊容一春心迹類萍蹤紅芳拂帽花
初落青眼看人柳正濃世事未須憂塞馬文章原
是媿真龍親知遠送城南路隔得雲山幾萬重

楊花四首

空向人間浪自飛落紅花信事全非章臺有恨飄

仍在隋苑多情見亦稀寒食池塘還裊裊暖風庭
院故依依天涯蹤跡渾難定聽徧啼鵲尙未歸
春來心緒太縱橫漫道顛狂久擅名但有游絲縈
去跡更無芳草慰離情紙鷁自昔功名薄榆莢同
時骨相輕此日紛紛看滿路敢將飛處與人爭
正與人爭路放翁句
楊花

何事柔條踈地長飄飄不繫一春忙難回繡閣重
簾底多在朱樓大道旁斷梗心情隨聚散浮萍身
世亦淒涼舊時只有尋常燕猶帶巢痕上畫梁
狂蜂驚蝶兩悠悠盡日輕塵散陌頭自昔玉關聞

遂怨至今江水使人愁征夫舊共飛蓬恨蕩子空
成浪跡遊但得相招聯臂裏飄零敢惜此生浮

琉璃河

漸遠長安日驅車感舊蹤山風梳馬鬣沙雨洗駝
峰帽影花千點鞭絲柳萬重平橋行歷祿午夢正
惺忪

旅店次壁間韻

矮屋蘆扉次第開陌頭車馬鎮相催行人絕似江
潮信每日如期兩度來

大隄風急散黃塵客路艱難面目陳只有門前一

株柳年年看老去來人

月夜過趙北口

四更鼓急行人忙明月照地如白霜車輪駱驛破
殘夢微風料峭吹衣裳馬頭忽覺開異景頗有秋
意如瀟湘僕夫指是趙北口到耳流水聲湯湯波
光上連月窈窕月色下映波蒼茫有時迴盪月如
綫的爍萬派生金光紅闌十二橋蜿蜒水中飛跨
晴虹長四圍極目勢空闊遠樹歷歷排青蒼西南
一缺更無際天畔仿佛通銀潢尋源萬里似可到
仰視浩淼寒無梁小舟點破水雲色一葉浮動輕

帆張沙礮出沒鷗翅濕浦激喋啞魚頭涼我當春
初亦過此紅塵十丈風飛揚那知景色本殊絕煙
水不減江南鄉吾杭山水妙天下西湖幽秀非尋
常況逢風月自清白定有佳客乘輕航今來好景
頗相類坐令見此悲殊方驅車一過不少住未免
面目慚滄浪行當歸去縱遊櫂莫負良夜如茲良

東阿道中

不盡天涯路長隄轍跡陳風迴能旋馬沙陷欲埋
人落拓難隨世閒關自惜身高堂念遊子白髮定
生新

車中偶題次陸孝廉韻

輾轉聲中位置安
蕭然行李稱身寬
跣趺暫作團焦比
徙倚還同小舫看
古道馬馱明月冷
官橋鈴語夕陽殘
柔腸一刻千回轉
絕似雙輪欲住難

雨後

沙隄馬足十分輕
雨後郊原入望清
一路林風涼不斷
棗花香裏過東平

翻車

車輪轉長途
仿佛船振柁
船行畏顛覆
車行慮偏頗
我車偶不穩
忽焉覆道左
有若棲樹鳥
風折連

巢墮輿夫扶不得我傷馬亦跛自笑未折臂難置
三公坐卽此見行路水陸無一可豈必盡崎嶇平
地有坎珂

滕縣卽目

雲山四面鬱蒼蒼薛北滕南驛路長十日雨鈴風
鐸裏行人獨自聽郎當

臺兒莊坐船

半月征塵滿扁舟位置寬離情拋水曲歸夢逐風
湍鼓櫂飛花送推篷夜雨寒不愁行路遠似比到
家安

雨次潤州

鐵甕城高俯大波，晚潮初勁水生渦。
人來塞北心猶壯，天入江南雨便多。
雲樹漸看鄉國近，郵亭細數旅程過。
百花名好村醅熟，自倒芳尊發嘯歌。

潤州酒名

丹陽竹枝詞

南北帆檣數潤州，不知何處是郎舟。
無情最是江潮水，纔到丹陽便不流。

九里鋪前流水長，柳條日日送人忙。
不願郎身似

香草生來只是愛離鄉。

丹陽有草類零陵離其故處始香俗號離鄉草

歸來

落魄成何事歸來倍惘然路難知骨瘦身舊畏人
憐氣盡貂裘裏魂傷馬足前故鄉容穩住且醉菊
籬邊

看秋海棠口占

寂寂空階雨映門秋棠點染出牆根幽情萬種無
人見閒摘紅香看爪痕

病起

誰問兼旬病蕭然自啟關人稀聞落葉坐久似空
山冷雨侵幽幌西風損瘦顏有懷秋雁至張觸又

飛還

歲晚寄鮑若洲都下二首前以奉懷後以
報近況也

憐君獨客向京華歲晚關河雨雪加
下第劉蕡終落魄依人王粲竟無家
袖中尺素親朋字夢裏寒梅故國花
我亦窮愁住鄉曲臨風吟望渺天涯
生來萬事不如人一醉誰教賦苦辛
自昔東陽憐獨瘦豈知南阮總長貧
還家客子黃金盡多病高堂白髮新
回首舊時游俠地霜天寥落雁行頻

萬年藤杖歌爲呂耜堂姨丈人賦

陰巖大谷地氣濃蒼藤宛轉盤春叢榮華蕉萃非
一狀根株往往山靈鍾中有一枝洵殊絕老幹不
受莓苔封皮膚剝盡筋脈露獨與金鐵相錚鏦誰
人採取向絕壁琅玕那復誇青紅人工不到鬼斧
截蠟指灰煮難爲功夜叉挺臂半倔強枯蛟脫骨
皆玲瓏過睂何用長七尺短勁恰稱偃僂胸我聞
朱藤謠見樂天詩只共屏几相追從又有名赤藤昌黎
賦此徒稱工胡孫鬼面各異態嘉名欲錫隨所通
豈知此杖堅且久想像未易爲形容年深日月不
可紀直以盈數推其終百齡之藤亦名耳欲乞何

必來光公東萊先生健腰脚矍鑠未許呼衰翁得
此亦足和醉倚頗覺行步雙肩隆指雲畫月等閒
事蹤跡多在湖上峰化龍事誕吾弗信但愁飛電
空堂中

上元夜坐

聞道重門夜漏遲天街十里影參差不知火樹銀
花裏多少繁華小庾詩

閒門風景太闌珊酒冷煙消語夜殘牕裏昏燈牕
外月滿堂清影一家寒

紅于歌

山舟表兄家買一小婢名紅于已二年
矣後知其叔祖乃葢林舅氏同年友也
亦先大夫同年山舟卽日具禮送歸其家義舉
也爲之歌以紀其事

如茶小女兩髻蓬長睂學畫猶未工長成愛惜不
出戶呼名只在深閨中名花本自遠塵俗一朝零
落隨凡叢自從家貧少餽粥八口難救囊閒空掌
中有珠惜不得宛轉竟入侯門重耶孃重利斷恩
愛從此有信難爲通可憐身去心空戀珍重耶孃
看女面華堂笑語且不聞外人那得常相見癡頑

翻得別家憐顏色徒聞同伴羨朝來侍立奉槃匱
昔日當牕弄花鈿聽喚新名尙自疑幾回欲出差
難現人生富貴安足恃烏衣竟作尋常燕公卿之
子爲卑隸此輩那不長貧賤翰林意氣蟠秋旻感
慨屢覺雙眉顰仁慈往往到臧獲恩施禮遣無因
循珠還合浦璧歸趙美質不沈泥沙塵世閒孤兔
亦有類敢使風俗傷其醇有觀見者增歎息知公
陰德誰與倫鍾離盛事渺難繼如此高義今無人
嗚呼如此高義今有人

湖上同梁二夬菴看新柳

半不禁風半舞風柔條欲畫恨難工幾番裁碧春
猶淺一望勻黃色似空桃葉正憐愁思早楊枝聞
說小名同未應盤作銀環樣先看長睂入鏡中

上巳後二日湖上作

兩年塵土客燕臺潑眼風光首重回春色慣催才
子老名山長閱酒人來千花氣結層雲現萬柳煙
扶曉閣閒只恐心情消未得隄閒踏遍總紅埃

皋亭桃花歌同高蘄至作

金梭玉杼垂絳紗片片裁出神仙家銀河織女浪
拋擲飛落萬匹機中霞皋亭山前桃塞徑亂蘂繁

枝似爭勝傾城士女來縱觀畫船壓水迴波定花
香香靄花冥濛笑靨面面迎東風半空暖豔散春
氣不知紅日梢閒紅漸看漸遠無斷絕或回或掩
如相綴市地千重彩霧迷撲天萬朶嬌雲熱遊人
當午花中行不聞人語聞蜂聲花光不定乍離合
天氣亦與爲陰晴歸船猶聽啼鴛送恍疑身出桃
源洞到家炫影動雙眸帳約流蘇幻春夢